



Broj: 16-12-16-2-6165-36/15
I. Sarajevo, 27.10.2015. godine

Na osnovu člana 10. stav (1) Zakona o Državnoj agenciji za istrage i zaštitu ("Službeni glasnik BiH", br. 27/04, 63/04, 35/05, 49/09 i 40/12), člana 25. stav (1) tačka (f), člana 69. stav (2) tačka d) i člana 70. st. (1), (2), (4) i (6) Zakona o javnim nabavkama ("Službeni glasnik BiH", broj 39/14), na preporuku Komisije za provođenje postupka nabavke broj 16-12-16-2-6165/15 od 16.10.2015. godine, u postupku javne nabavke usluga redovnog i kasko osiguranja službenih vozila Državne agencije za istrage i zaštitu, zamjenik direktora Državne agencije za istrage i zaštitu, d o n o s i

ODLUKU

o poništavanju postupka javne nabavke usluga redovnog i kasko osiguranja službenih vozila
Državne agencije za istrage i zaštitu

Član 1.

U otvorenom postupku za dostavljanje ponuda za javnu nabavku usluga redovnog i kasko osiguranja službenih vozila Državne agencije za istrage i zaštitu, za koji je obavještenje o javnoj nabavci broj 1161-1-2-690-3-17/15 objavljeno u "Službenom glasniku BiH", broj 59/15, a ispravka obavještenja o javnoj nabavci broj 1161-1-2-690-8-22/15 objavljena u "Službenom glasniku BiH", broj 68/15, poništava se postupak javne nabavke, iz razloga što nijedna od primljenih ponuda nije prihvatljiva.

Član 2.

Ova odluka se ponudačima dostavlja u roku od tri dana, a najkasnije u roku od sedam dana od dana donošenja Odluke, uz istovremeno objavljivanje na internetskoj stranici Državne agencije za istrage i zaštitu.

Član 3.

Ova odluka stupa na snagu danom donošenja.

O b r a z l o ž e n j e

Odlukom direktora Državne agencije za istrage i zaštitu (u daljem tekstu: Agencija) broj 16-12-16-2-6165-1/15 od 13.07.2015. godine pokrenut je postupak javne nabavke usluga redovnog i kasko osiguranja službenih vozila sa uslugom tehničkog pregleda i registracije za

period od dvije godine za potrebe organizacionih jedinica Agencije, putem otvorenog postupka, procijenjene vrijednosti 42.700,00 KM bez uračunatog PDV-a na godišnjem nivou.

Obzirom da je tačkom 23. Tenderske dokumentacije navedeno da je rok za dostavljanje ponuda 11.08.2015. godine do 12,00 sati, te da je zbog izjavljene žalbe na Tendersku dokumentaciju rok za dostavljanje prijave produžen do 02.09.2015.godine do 12 sati, to je Komisija dana 02.09.2015. godine u 13,00 sati izvršila javno otvaranje ponuda prema datumu i vremenu prijema.

Blagovremeno su dostavljene ukupno četiri ponude i to:

Redni broj	Naziv ponuđača	Vrijednost ponude (bez PDV-a)
1.	„BOSNA SUNCE OSIGURANJE“ D.D. SARAJEVO	87.499,89 KM
2.	„DUNAV OSIGURANJE“ A.D. BANJA LUKA	88656,71 KM
3.	„DRINA OSIGURANJE“ A.D. MILIĆI	84.967,60 KM
4.	„SARAJEVO OSIGURANJE“ D.D. FILIJALA BANJA LUKA	63.279,77 KM

Komisija je nakon otvaranja ponuda, u smislu člana 63. st. (5) i (6) Zakona o javnim nabavkama („Službeni glasnik“, broj 39/14) (u daljem tekstu: Zakon) sačinila Zapisnik o otvaranju ponuda i isti u roku od tri dana, od dana otvaranja, dostavila ponuđačima.

Postupak je dalje nastavljen u smislu pregledanja dokumentacije priložene uz svaku pojedinačnu ponudu, a u cilju ocjenjivanja svakog pojedinačnog ponuđača, te njihove kvalifikovanosti shodno uslovima navedenim u Tenderskoj dokumentaciji.

Uvidom u sadržaj dostavljenih ponuda Komisija je utvrdila da ponuđači ne ispunjavaju kvalifikacione uslove iz Tenderske dokumentacije i to: „Bosna Sunce osiguranje“ d.d. Sarajevo ne ispunjava uslove u pogledu lične sposobnosti i ekonomske i finansijske sposobnosti, „Dunav osiguranje“ a.d. Banja Luka i „Sarajevo osiguranje“ d.d. Filijala Banja Luka ne ispunjavaju uslove u pogledu ekonomske i finansijske sposobnosti, dok „Drina osiguranje“ a.d. Milići ne ispunjava uslove u pogledu lične sposobnosti.

Tačkom 12. Tenderske dokumentacije traženo je da ponuđači kao dokaz ispunjavanja uslova u pogledu lične sposobnosti (da nije osuđen pravosnažnom presudom za krivično djela organizovanog kriminala, korupcije, prevare ili pranja novca, da nije pod stečajem ili nije predmet stečajnog postupka, da je ispunio obaveze u vezi sa plaćanjem penzijskog i invalidskog osiguranja i zdravstvenog osiguranja i da je ispunio obaveze u vezi sa plaćanjem direktnih ili indirektnih poreza) iz člana 45. Zakona dostave izjavu popunjenu i ovjerenu kod nadležnog organa, s tim da dostavljena izjava ne smije biti starija od 15 dana od dana predaje ponude.

Takođe, Tenderskom dokumentacijom kao jedan od uslova da ponuđač ispunjava kvalifikacione uslove u pogledu ekonomske i finansijske sposobnosti traženo je da je kod ponuđača odnos prijavljenih i riješenih šteta veći od 80% za broj realizovanih šteta i veći od 65% za vrijednosti realizovanih šteta. Kao dokaz ispunjavanja naprijed navedenog uslova ponuđači su u skladu sa Tenderskom dokumentacijom bili obavezni dostaviti potvrdu nadležnog organa (Agencija za nadzor osiguranja) u kojoj je naveden odnos primljenih i riješenih štata u 2014. godini izražen u procentima.

Uvidom u ponudu ponuđača „Bosna Sunce osiguranje“ d.d. Sarajevo Komisija je utvrdila da navedeni ponuđač ne ispunjava uslove u pogledu lične sposobnosti i ekonomske i finansijske sposobnosti. Naime, ponuđač „Bosna Sunce osiguranje“ d.d. Sarajevo je kao dokaz ispunjavanja uslova u pogledu lične sposobnosti dostavio popunjenu izjavu koja je od strane nadležnog organa ovjerena dana 03.08.2015. godine. Obzirom da je navedni ponuđač ponudu dostavio Agenciji dana 27.08.2015. godine to je Komisija utvrdila da je dostavljena

izjava u pogledu ispunjavanja uslova lične sposobnosti starija od 15 dana od dana predaje ponude. Takođe, ponuđač je kao dokaz ispunjavanja uslova ekonomske i finansijske sposobnosti u pogledu odnosa primljenih i riješenih šteta u 2014. godini dostavio Obavještenje Agencije za nadzor osiguranja Federacije Bosne i Hercegovine broj 1.0-059-1261/15 od 04.08.2015. godine prema kome je kod navedenog ponuđača procentualni odnos riješenih i prijavljenih šteta kod kasko osiguranja po broju 76,45% i po vrijednosti 74,75%, dok je procentualni odnos riješenih i prijavljenih šteta kod autoodgovornosti po broju 74,38%, a po vrijednosti 68,69%. Cijeneći dostavljeni dokaz Komisija je konstatovala da je kod ponuđača „Bosna Sunce osiguranje“ d.d. Sarajevo stopa efikasnosti po broju riješenih odštetnih zahtjeva manja od 80% i kod kasko osiguranja i kod autoodgovornosti.

Obzirom na naprijed navedeno ponuda ponuđača „Bosna Sunce osiguranje“ d.d. Sarajevo nije dalje razmatrana niti je bila predmet vrednovanja.

Uvidom u ponudu ponuđača „Drina osiguranje“ a.d. Milići Komisija je konstatovala da navedeni ponuđač ne ispunjava uslove u pogledu lične sposobnosti. Naime ponuđač „Drina osiguranje“ a.d. Milići je kao dokaz ispunjavanja uslova u pogledu lične sposobnosti dostavio popunjenu izjavu koja je od strane nadležnog organa ovjerena dana 11.08.2015. godine. Obzirom da je ponuđač ponudu dostavio Agenciji dana 02.09.2015. godine to je Komisija konstatovala da je dostavljena izjava o ispunjavanju uslova lične sposobnosti starija od 15 dana od dana predaje ponude, zbog čega ponuda ponuđača „Drina osiguranje“ a.d. Milići nije dalje razmatrana niti vrednovana.

Uvidom u ponudu ponuđača „Dunav osiguranje“ a.d. Banja Luka Komisija je konstatovala da navedeni ponuđač ne ispunjava uslove u pogledu ekonomske i finansijske sposobnosti. Naime ponuđač je kao dokaz ispunjavanja uslova ekonomske i finansijske sposobnosti u pogledu odnosa primljenih i riješenih šteta u 2014. godini dostavio akt Agencije za osiguranje Republike Srpske broj 03-310-31-1/15 od 31.08.2015. godine prema kome je kod navedenog ponuđača na dan 31.12.2014. godine stopa efikasnosti u rješavanju odštetnih zahtjeva-osiguranje od autoodgovornosti 72,36%, stopa efikasnosti u isplati odštetnih zahtjeva-osiguranje od autoodgovornosti 96,77% , stopa efikasnosti u rješavanju odštetnih zahtjeva-kasko je 72,89%, dok je stopa efikasnosti u isplati odštetnih zahtjeva-kasko 98,88%. Cijeneći dostavljeni dokaz Komisija je konstatovala da je kod ponuđača „Dunav osiguranje“ a.d. Banja Luka stopa efikasnosti u rješavanju odštetnih zahtjeva manja od 80%, što nije u skladu sa Tenderskom dokumentacijom.

Takođe uvidom u ponudu ponuđača „Sarajevo osiguranje“ d.d. Filijala Banja Luka Komisija je konstatovala da je navedeni ponuđač kao dokaz ispunjavanja uslova ekonomske i finansijske sposobnosti u pogledu odnosa primljenih i riješenih šteta u 2014. godini dostavio akt Agencije za nadzor osiguranja Federacije Bosne i Hercegovine broj 1.0-059-1350/15 od 05.08.2015. godine prema kome je kod navedenog ponuđača procentualni odnos riješenih i prijavljenih šteta kod kasko osiguranja po broju 74,58% i po vrijednosti 80,71%, dok je procentualni odnos riješenih i prijavljenih šteta kod autoodgovornosti po broju 72,86%, a po vrijednosti 55,25%. Cijeneći dostavljeni dokaz Komisija je konstatovala da je kod ponuđača „Sarajevo Osiguranje“ d.d. Filijala Banja Luka stopa efikasnosti po broju riješenih odštetnih zahtjeva manja od 80% i kod kasko osiguranja i kod autoodgovornosti, dok je stopa efikasnosti u rješavanju odštetnih zahtjeva po vrijednosti kod autoodgovornosti manja od 65%, što nije u skladu sa zahtjevima iz Tenderske dokumentacije.

Obzirom na naprijed navedeno, a uvažavajući preporuku iz Izvještaja o radu Komisije, odlučeno je da se predmetni postupak okonča donošenjem odluke o poništavanju postupka javne nabavke usluga redovnog i kasko osiguranja službenih vozila Agencije, u skladu sa odredbom člana 69. stav (2) tačka d) Zakona, iz raloga što nijedna primljena ponuda nije prihvatljiva.

Na osnovu naprijed navedenog odlučeno je kao u dispozitivu.

Pouka o pravnom lijeku: Protiv ove odluke može se izjaviti žalba Uredu za razmatranje žalbi Bosne i Hercegovine, u roku od pet dana od dana dostavljanja iste. Žalba se podnosi putem Državne agencije za istrage i zaštitu.

Na izjavljenu žalbu ponuđač je obavezan platiti naknadu u skladu sa članom 108. Zakona o javnim nabavkama.

DOSTAVLJENO:

- Ponuđačima 4x (elektronskim putem),
- Sektoru za mat - fin poslove,
- a/a.

ZAMJENIK DIREKTORA
GENERALNI INSPEKTOR POLICIJE

Đuro Knežević